




21971

III

Mag. St. D. P.

*Manuskowic Valentini Joas: Monumentum de
bitae gratitudinis immortalitate.*

PANEG. et VITAE
Polon. Fol.
№ 825.



MONUMENTVM

Debitæ Gratitude immortalæ,

Perillustri & Admodum Reuerendo Domino,

D. ALBERTO
NOWIEYSKI,
I. V. DOCTORI
CANONICO VARMIENSI.

Viro ob celsissimas animi ingenijque dotes, vt in vita amores
omnium; ita à morte desideria promerito,
pro insigni, raro, Heroico.

DOMVI COLLEGII MINORIS
INCLYTÆ VNIVERSITATIS CRAC.

Inter angustias accisorum redituum,

Munificētis: fundationis præstito beneficio,
Officiosissimo plaudentis Suadæ obsequio.

EXCITATVM.

Et ad immortalem Magni Patroni, Amantissimiq; literarum
literatorumq; Mœcenatis memoriam conseruandam:

L V C I P V B L I C A E

P E R

M. VALENTINVM IOANNEM MAZVRKOWIC,
Eiusdem Col: Min: Professore.

DEDICATVM.

Anno à Gratississimo Virginis Partu, 1665.

C R A C O V I A E,

Typis NOWODWORSCIANIS In Officina Apud Heredes STANISLAI LENCZEWSKI,
Anno Domini, 1665.

M.

7. XII. 9.

IN STEMMA ILLVSTRISSIMI P R Æ S V L I S.



Quid sibi vult duro C R V X Aurea iuncta metallo?

Cur rutilum cingit Circulus iste iubar?

His signat sæclis in ferrum spontè refulsis,

Aurea W Y D Z G A N A M germina ferre Domum.

P R Æ S V L E Æ signat Lucem pietatis amānam,

Solari Lechiæ tristitia fata suā.

Vtq; sinus Soleæ radijs C R V C I S ecce refulget;

Sic ab eā faustos, sæcla habitura, dies.

ALEXANDER de Stradomia STRADOMSKI,

Eloqu; & Philos. Studiosus.



21.971 III

Illustrissimo & Reuerendissimo Domino,
D. STEPHANO
WYDZGA,
DEI, & APOSTOLICÆ SEDIS GRATIA,
Episcopo Varmienfi, & Sambienfi, &c. &c.

Dño Patrono & Mæcenati meo Amplissimo S. & P.



Escit conscia gratitudinis aterna eruditorum penna, posteaquam suorum Mæcenatum corpus, in quo magnus ille eorum habitator animus gloriosissime hospitabatur, cuncta sternenti mortis violentia cecidit in victimam; singularem etiam eorum, rarissima in se munificentia recordationem: ipsæ illis, quibus adopertum est in cineribus, favillisq; flebilibus sepelire JLLVSTRISSE & REVERENDISSE ANTISTES. Saviat licet inexorabilis ista Diva liuido morsu in ea omnia, quæ humano animo velut tenuissima velamenta, videt circumiecta: interceptat tristi fato cuncta ista, quæ ad communem ruinam fors ipsa nascendi destinavit: conuoluat inopinato euentu, totum id, quidquid ex malè conuenienti pugnantium secum elementorum temperie coaluit: literatorum tamen valide sudat connititurq; industria, ut tanto amplius è tumultu, velut è circumfusus tenebris euoluat lucidum conspicuumq; virtutis suorum Patronorum fulgorem; nullisq; vltra angustis arctatum limitibus, gloriosa eternitatis in domicilio collocet eminenti. Et verò possent, sine grandi piaculo, Patronorum suorum benignitatem in gratiâ obruere reticentiâ? Si enim hoc munus illorum est hocq; officium, Laureatam magnorum Virorum virtutem in publicum Orbis theatrum, è gloriosis illis in quibus quiescunt ruderibus, pennato immortalis fama efferre curra, præclaraq; vita eorum exempla è tenebris eruta obliuionis, auida talium representare posteritati: quanto magis ea ipsis incumbit cura, in longissimas atates suorum extendere memoriam Mæcenatum, quorum potissimum beneficâ liberalitate sublimius eluata sua penna, felicibus ausis transcendunt vagos nubium tractus, & in ipso illo sereno immortalitatis conquiescunt. Blandiamur enim nobis quantumcumq; volumus literati, de Stoico illo in sustinendis malis supercilio, si tamen longissime ab affectatâ pauperzatis recedentes ostentatione, pro candidissima sensu veritatis loqui voluerimus, cum omnium experientia sæculorum compellemur profiteri: quantumuis vniuersis cogitationibus assueta ingenia, nihil per se valitura, nisi accedat spiritus ille & anima benignitatis Patronorum, quæ discurrens per torpentes literatorum artus, iacentes languentesq; suas operas suo vigore animet, nec unquam quiescere patiatur. Argumenta hic nobis ad confirmandam veritatem anxie non sunt colligenda, nec scrupulosè testes inquirendi: quandoquidem nos ipsi simulatq; ad hunc scopulum appulimus, hærentes in vado deprehensiq; didicimus abundè; non facile horrendum eruditionis perlustrari Pelagus; nisi adsit Pharos Mæcenatum largitatis lucidissimum lumen cuibrans, quæ per implexas illas difficultatum ambages agere gradum promouentes, felicissimo dirigat euentu, & in optato tandem sistat portu. Hæsisset enim haud dubiè nostra mediocritas, tanto etiam magis per temporum iniquitatem inualecente in nos asperissima fluctu sortis: nisi JLLVSTRIS NOWIEYSCIVS opportunè proteruiam in nos irruentis compescuisset, & verè tanquam DEVS aliquis è machina, in hanc miseriarum nostrarum scenam semet intulisset. Exsoluimus immortale gratiarum actionis tributum, inaudita eius in nos profusione, multoq; ipsi æquius, quam Neptuno illi Sospitatori aram in littore nostræ securitatis collocamus. Exosculamur rarissimam munificentiam, illiq; tanquam quietis nostræ restitutori, bonorum assertori, commodorum propagatori hoc debite gratitudinis in-

nis in sacratio Musarum erigimus Monumentum. Habeat sibi excitatum istud Tropheum,
 Vir Maximus, non de victa superataq; nationum potentia, non de subiecta prostrataq; genti-
 um magnitudine, non de opimis Urbium, Arciumq; spolijs: sed de rebus afflictis literata-
 rum mentium subleuatis. Fruatur famâ quam meruit, eternitate quam quesivit, nostrisq;
 perpetuis honoribus celebretur: quandoquidem nulla ei alia succrescere potest gratitudo. Quan-
 quam quid loquor? nostrane ut ulla sit tam potens, solidaq; structura facundia? tam compa-
 ctum eruditi sermonis opus? quod huic Monumento solui nesciam imponat coronidem, fasti-
 giumq; superextruat duraturum? In sinu in gremio Magni alicuius Macenatis, tanquam
 in late patenti aliquo campo, Basis fundamentumq; Monumenti nostri collocandum est, ut lon-
 gam stando aetatem ferre possit, ut nullis validis lincentium Eolorum concutiat flabris, ut
 omnes malignitatis iniurias supergressum sublimi feriat sydera vertice, subie-
 ctam calcet Fortunam, & orbem in se corruentem. Quis autem ille nobis erit aut potior,
 aut prior, nisi tu JLLVSTRISIME ANTISTES: Tua illa aurea pectoris ornamenta, su-
 blimes ditissimi cordis diuitia, illud oris pondus indomitum, quo in possessionem omnium ve-
 nis animorum; illa ad miraculum usq; inclarescens, publicis in consilijs prudentia; illa alia,
 quam in teipso circumfers, irradiata splendoribus Magnificentissima virtutum pompa, ful-
 crum nobis erit, quod quibuscunq; Pario de lapide factis anteferatur fulcimentis. Ad Tui
 Nominis splendidissimum exoriens iubar, si qua demoliri volentium hoc Monumentum con-
 surget audacia; frangetur: si quis se affundet caliginosa noctis horror; illustrabitur: si qua
 obstinata aliquorum inualescet proteruita; domabitur: si qui inuidie vehementes spirabant
 venti; sopientur. Ita enim pari consortio suauis humanitatis Tuae lumen, & vehemens Di-
 gnitatis Tuae iubar in Te coniunguntur, ut non minus liuidi in Tuo Vultu habeant, quod ti-
 mere cogantur; quam boni quo sua modestia erigatur. Suscipe proinde JLLVSTRISIME
 PRÆSVL, exile istud Monumentum, quod ita Tuam facilitatem prensat; ut simul à Te in-
 ploret patrocinium: ita Tuam adit benignitatem; ut simul optet sibi opitulari dignitatem:
 ita mitissimi Tui oris ambit serenitatem; ut simul à Gratijs cinctâ Maiestate Tuâ pollicea-
 tur sibi eternitatem. Nostrum autem erit, non iam in transcurso quasig; de via, & aliuc-
 agendo (quod hic à nobis factum) Tua litare dignitati: sed maioris Minerue muneribus, quas
 expressore signo aeternum Tibi cultum, obsequiumq; testari: & post accensum istud exigua ve-
 nerationis Thymiama, sublimiori apparatu adire eternitatis Tuae aram: ut Tibi mox, inau-
 rato Taurus cadat Hostia cornu. Sic viue, vale, floresce JLLVSTRISIME PRÆSVL,
 Religioni, Reipublice literis, prasidio, solatio, ornamento, & serus in calum redi.

Illustriss. & Reuerendiss. Dominationis Tuae,

Cliens deditissimus,

M. VALENTINVS IOANNES MAZYRKOWIC.



ORATIO.



N tantâ NOWIEYSCIANÆ in nos liberalitatis profusione, vtinam aliquis nobis nouus Orator nasceretur, qui augustâ Eloquij tubâ, sonoro facundiæ plausu, magnificâ sermonis maiestate, Antiquorum Oratorum, quos vt Numina Eloquentiæ tot^o suspicit & veneratur Orbis, dicendi venustatem dignitatemque pari propè cothurno æmulatus, eius gloriam totis viribus ad æternitatem promoueret. Nam si illi antiqui Oratores, minora etiam dicendi argumenta, tam florido tamen verborum apparatu exornata humanis subiiciebant aspectibus, vt res non tam vocis adminiculo proferri, quàm potiùs in tabula viuïs depictæ coloribus omnium exponi obtutibus clarissimè viderentur: quantâ hîc curâ quantoq; studio versandum esset in NOWIEYSCIO meritissimis laudibus exornando, qui primus ferreis istis temporibus, verè in nostras miseras edurantibus præluxit ad literas in beatiorum restituendas statum, transtulit exemplum ad posteritatem singulare in bonis ingenijs attollendis, inspirauit vigorem salutarem tristib⁹ hac tempestate Musis, promptissimâ in Altricem suam benignitate, perpetuam ipsi in eius conseruanda dignitate suam operam, suumq; studium mirificè comprobauit. Dolebamus nimis & vehementer angebamur, eam esse stationis nostræ ACADEMICÆ infelicitatem, vt nonnisi studia nostra, communi quodam sæculi præiudicio, ad splendidam pauperiem damnarentur: mærebamus eam esse temporum conditionem, vt circumtonantibus vndiq; sæuientium bellorum fragoribus, quiduis potiùs in pretio esset, quàm amor literarum: affligebamur non leuiter ob exiguos istos redditus, quibus tenuissimè satis viuēbamur interceptos: rerum propè omniū penuriam, in Musæa nostra, infestos inferre pedes querebamus: iamq; nobis propè libri è manibus excidebant, stylus diuturnis impeditus curis ægrè, quasiq; refugiens abdensq; sese profluebat, malè implexis obruta molestijs ingenia respondebant, omnisq; nostra conuulsa tranquillitas videbatur. Ecce verò præter omnium spem occurrit Illustris NOWIEYSCIVS, effudit benignissimum fortunarum sinum in ACADEMIAM, vt, quia in languorem & paupertatem ibat, eam honestissimâ tantæ liberalitatis accessione confirmaret. Sparsit maiorem facultatum suarum partem, vt quia infesto solitudinum tumultu quatiebatur, suâ eam paternâ prouisione recrearet, refoueret. Complexus est munificentia suæ gremio Professores, vt quia ab omnibus propè auxilijs in Summa Mæcenatum raritate deserebantur, suo eos opportuno succursu erigeret, attolleret, solaretur. Sic iam nouo fortunæ suæ incremento gloriabuntur Professores, & splendidiorem

nacti conditionem, tantò libentiùs libera pectora in studiorum laxabunt curam, tantoq; diligentius, nobilibus occupationibus, expeditos animos applicabunt. Huic ergò tanto tamq; insigni in literas earumq; Professores beneficio, si quispiam in antiqua illa Oratorum reponendus classe laudator, accederet, quàm ille nitido comptoq; verborum apparatu vteretur, quàm variâ, solidâ, aptâ, viuîdâ, numerosâ, compositâ describeret illud elocutione, quantam in verbis masculam expressionem, in sententijs animosam grauitatem, in dictis lepidissimas argutias elegantiamq; præferret. Excuteret profectò omnia Isocratis myrothecia, omnes dicendi arculas, omnia Oratorum pigmenta exhauriret, omnes arcanas quasdam præscriptiones artis expromeret, omnes robustissimos formandi sermonis intenderet neruos: cumq; Orationem diurnâ ingenij commentatione satis ad venustatem effectatam, multâ meditatione paratam, quiete ipsâ dulcem, amœnam stylo, conformatione verborum floridam fluentemq; proferret in medium, vsq; adeò in singulis eximij huiusce facti, quasi per gradus attollendis progrediretur laudibus, vt omnes facîle viuum ac spirans beneficentissimæ cuiusdam & ditibus Pactoli arenis nunquam comparandæ Nowieysciæ bonitatis, defixum in hoc loco ad posteritatis memoriam sempiternam, intuerentur simulacrum. Nunc autem à me Vir maxime (Te enim appello immortalem, quandoquidem ab hominibus sanctè & compositè demigrans, ad Diuorum æternam, quam tot virtutib' promerueras tibi, census & adscriptus es hæreditatem) à me inquam infantissimo laudaberis, cui vt adsit propensissima voluntas aspectabilem liberalitatis tuæ imaginem cunctorum in mentibus ad perennitatem profundè insculpendi, æqua certè facultas id ipsum efficiendi non suppetit. Quid enim ego in Oratione suauitate dulce, impetu acre, calore viuîdum, argutijs excitatum, figuris illustre, vniuersâ dicendi potentiâ validum adferre potero? cui nec natura præclaras ingenij est largita dotes; nec consuetudo difficillimam dicendi scribendiq; Prouinciâ satis reddidit familiarem; nec experientia quæ mediocria etiam & infra vulgus latentia ingenia in serena sapientiæ manu ducit templa, magnopere industriam labantem, titubantem, hærentemq; sæpiùs confirmauit; nec ipse labor qui aliorum tenuitati suffragari solet, in ista virium mearum imbecillitate, satis efficaci potest auxilio opeq; præsentî, difficultates quæ hic nascuntur, amoliri. Obruor vel ipsâ cogitatione, totiq; artubus contremisco, ne simulac cum illo Phaëtonte tam sublimes volatus meditari cæpero, magnis & temerarijs excidens ausis in præceps ruam; aut cum illo Atlante onus humeros etiam Herculeos lassaturum subire tentauero, ipse ruina fiam, meoq; ipsius proiecti tumulo testari cogar, neminem id sibi faciendum cogitare debere, quod suarum virium transgreditur imbecillitatem. Et tamen quidquid hic pro meæ tenuitatis patrocinio declamaui, ingratum est, cum tantum beneficium non debeat, nisi illustribus elogijs pleniq; laudib' commendari. Si enim saxa etiam, solitudines, cautelsq; durissimæ, quoties in silentibus earum receptaculis clamosi eduntur soni, mittunt vocalem per vniuersas partes suas Echonem, & dimidiatam quam receperunt propellunt quâquâ versus vocem: an nos decet in tam clarâ Nowieysciæ beneficentia

tiæ contestatione saxi ipsis surdiores, elingues obrigescere in statuas, quasi non in publico Sapientiæ Prytaneo laboriosi doceamus Professores; sed in humenti aliquo stagno muti natemus pisces. Si olim anseres obsidentibus Capitolinam arcem Gallis, iamq; in muros euadentibus, venerati fortunam Romæ, liberalitatiq; sese pascentium gratificantes ciuium, eum clangorem sustulisse dicuntur, ut in somnum declinantem custodum vigiliam excitarent velocius, ad ferendum periclitanti Capitolio tempestiuum subsidium: quid nos facere decet, quibus non hostes aliqui capitales appropinquant bonis fortunisq; nostris inhiantes: sed amicissimus, sed beneuolentissimus NOWIEYSCIVS in oculos, in animorum occultos sinus, in abditas pectoris latebras cum nouo beneficentiæ illabitur genere, omnes ærumnas nostras depulsurus. Quantumuis igitur me sentiam anserem inter alios suauissimè, in hac ACADEMIA modulantes Cygnos, videamq; ea mihi adesse impedimenta, quæ mihi perpetuum forent impositura silentium, excipiam Te tamen Patrone noster voce gratissimâ, voce amoris affectusq; plenissimâ, voce candoris propensionisq; indice manifestissimâ voce quâ balbutientes filiolî, carissimorum parètum, diuturnam absentiam, felicissimo postliminio, domum redeuntem recipere solent. Quid tu mihi maligne liuor obijcis temeritatem? non temerarius sed gratus esse volo; quid tu mihi cæca inuidia infantiam opponis in dicendo? infans licet, beneficij tamen expensor esse cupio; quid tu vesana calumnia meæ linguæ ruditatem cauillaris? pius esse in Patronum, in Mecænatem meum desidero. Loquar cum omnibus pro omnibus, & cum cessabunt deficientq; verba, officiosum affectum fundam. Ex Aristotelis non Pythagoræ Lyceo venio, nec quinquennij exilio vocem puniui ut mutus essem; sed beneficium agnoscere didici, ut quo quomodo tester. Vos carissimi Confratres mei, quos eadem mecum cura liberalissimum celebrandi Benefactorem tangit, expendite diligentius quid non possum, ut vos felicius impleatis quod potestis: dumq; in vmbra tenuitatis meæ pulcherrimum hoc NOWIEYSCIANÆ bonitatis exemplar natiuo suo colore effulgescens aduertetis: cogitate quibus eum splendoribus eloquij, è numero communis exemptum laudationis, in posterorum animis, in recordatione venturi temporis, in ipso immortalitatis fastigio, illustrem, spectatum, decorum, plenoq; iubare relucens faciat. Vnde nam verò in hoc primo ad institutum meum ingressu exordiar? quod Propylæum tam augusto superexstruam ædificio? An Oratorum more per singulas NOWIEYSCIANÆ vitæ partes progrediar? ortum eius quàm fortunati dies exceperint, pueritiam quàm sedula parentum diligentia educarit, adolescentiam quàm accurata Professorum industria poliuert, virilem ætatem qui labores functionesq; durauerint, senectutem qui honores exornarint, vitæ finem qui obitus placidissimus decorarit, styli officio comitabor? An potius singulas eius virtutes, quibus eluxit, Pietatem, boni publici studium, Religionis zelum, charitatem in proximos, constantiam in aduersis, in prosperis moderationem, aliasq; quibus nomen suum ad immortalitatem consecrauit, celebrabo? Certè æquissimum esset, seruare posteritati, & ab obliuione ab interitu vindicare, omnes quas præsentis miramur virtutes, ut eius tantò facilius con-

fulatur imitationi. Iustissimum etiam literarum nostrarum vindicem, vindici obliuionis calamo, totum quantus est seris monstrare nepotibus, ut talis nostrâ operâ spectetur semper, qualem se semel exhibuit, dum vixit in terris: nisi quod tenuitas mea dum suos artus librat, dum respicit artes, huic tanto oneri laudum ne diuiso quidem & dispertito est ferendo. Relinquatur ergo ista excellentioribus ingenijs illibatissima integerrimaq; totum NOWIEYSCIVM laudandi Sparta, ego me satis meo in desideratissimum Patronum officio functurum putabo, si ex hac admirandâ fertilissimarum virtutum vbertate, quasi ex amæno fragrantissimis vndiquaq; colluscente flosculis viridario, hanc solam in literas munificentiam, summo tenus digito delibabo. Dicam igitur NOWIEYSCIVM hoc insigni Professoribus collato beneficio, multum sibi Rempublicam obstrinxisse. Laudabo deinde prudentiam eius, quod ACADEMIÆ Professores delegit sibi exornandos. Alacritatem etiam pietatemq; eius in Almam Altricem suam celebrabo. Ad extremum ostendam quid ille à nobis pro tanto merito requirat, quidue nos ei debeamus. Accurata non satis, neq; satis dulciter influenti in aures audientium, in oculos legentium Orationi, quisquis ignoscendum putauerit, inopiamq; ingenij mei, ut NOWIEYSCIVS fortunæ subleuârit, cum ego quàmuis in alijs elinguis sim, non benignum modò, sed etiam prudentem disertè semper appellabo.

Atq; ut à primò prius aggrediar, quid in mentem Viro maximo & solertissimi ingenij perspicentiâ in ipsas propè rerum latebras semet immergenti venerit, ut circumspectâ multorum annorum parcimoniâ collectas suas facultates, potissimum in bonarum literarum Professores opportunâ fouendos prouisione conuerterit contuleritq;, haud difficile est coniectare. An ille cum Diuino quodam ingenio, singulariq; ex usu multarum rerum collectâ prudentiâ omnia quæ forent ex vtilitate publica prospiceret, hoc vnum non videret; literarum potissimum diligenti cultu, & sedulâ tractatione, Reipublicæ magnâ ex parte stabilem solidamq; contineri felicitatem. Literarum porrò totam lucem, totum splendorem fulgoremq; nitidissimum hinc potissimum efflorescere; si Professores honestis præmijs ad strenuam in literis nauandam operam excitentur, animentur. Ut ergo tantò facilius tantòq; efficacius ex suis sine cuiusquam iniuria damnoq; quæsitis bonis, aliquid in Rempublicam commodi proueniret deflueretq;: literarum sibi potissimum Professores putauit onerosâ duræ paupertatis malignitate liberandos, ut cum illi seriâ semper industriâ eruditum hunc literarium versarent orbem, tantò vberius in Rempublicam omnis boni semina spargerentur. Neque verò ego quenquam existimo, vel cum amuso Licinio in literarum odium conspirasse, vel cum barbaris Gothis Arcadico stupore oppletum pectus gerere, qui non fateatur, quidquid in cultissimis Imperijs est pereximiæ dignitatis, quidquid in amænissimis regionibus suauissimæ deprehenditur humanitatis, quidquid decoris nitorisq; in Ciuitatibus cernitur opulentis, quidquid in nobilissimis incolis laudatur ingenuæ comitatis, quidquid in eminentibus Ordinibus clarissimi splendoris in oculos incurrit, quidquid in Ecclesijs veræ orthodoxæq; effulgescit Religionis, deniq; quidquid in Rebuspub: vetustissimi moris, aut ingentium virtutum notatur amplitudinis, quidquid

quidquid ubiq; locorum alacritatis, animositatis, & occultæ cuiusdam conspicitur salubritatis; id totum inscribendum esse literarum incitatissimo vigori, cum florentissimis ingenijs abundant imperia, & maximis præmijs Professores aluntur ad verum decus. Quæ res vt tantò facilius non profunde tantum in animos; verumetiam in oculos cunctorum manifestis deueniat indicijs: agedum hæc omnia breuiter sub similitudinum tersissimo speculo contemplemur. Quid quæso sunt literæ nostræ doctrinarumq; nostrarum amœnitates? quid literarum Professores, & omnis solidioris Sapientix Mystæ venerandi? Literæ fontes sunt, grato sinuosoq; flexu, limpidissimos virtutis & doctrinæ riuos, in Ecclesiæ & Reipublicæ agros deuoluentes. Professores sunt horum fontium amœnissimi canales, qui desilientem ex ijs iugi labore excipiunt lympham, bonoq; rursus publico transfundunt copiosè. Literæ vernantes horti sunt, omni genere florum selectissimæ eruditionis consiti, quorum mirifico odore, melius quàm delicatis Arabicis aromatibus, calamisq; Indicis languentes Reipublicæ excitantur vires. Professores sunt hortorum talium tutelares Diui, qui vigili custodiâ intentam oculorum aciem claudunt nunquam, ne quæ immanis ignorantix vitiorūq; fera, protuberantes hæc Mineræ opes, feroci dente carpat. Literæ lucidissimæ Stellæ sunt, quæ cursibus indefessis per immensas mundi discurrentes vias, hanc pulcherrimam rerum omnium varietatem in Imperijs, has Politix leges, hæc Ecclesiæ sancita, hanc Religionis puritatem, influxu suo gignunt & producant. Professores sunt harum Stellarum motrices intelligentiæ, quæ suis laboriosissimis impressionibus has perficiunt agitationes, & ne languescat virtus, insidiantis desidix veterum pellunt, ad officia promptissimæ, & otium pœnam iudicantes. Literæ Palladium sunt, quo melius quàm illo Troiano vafri Sinonum eluduntur astus, feroces Diomedum retunduntur impetus, acres Aiacum coërcentur impressiones, non vnaque Priami Patria, non decennialibus, sed perpetuis bellorum deflagrans incendijs munitur firmaturq;: Professores sunt huius Palladij excubitores acerriimi, qui hoc Rebuspublicis bonum, nullis apertis viribus, nullis occultis astibus eripi patiuntur. Literæ aureum vellus sunt, quod non vnus Colchidis extremam summis in periculis ditat paupertatem; sed omnes Prouincias beatissimâ circumfundit opulentia. Professores sunt huius velleris centoculi Argi, quorum omnes in eo consumuntur curæ, ne qua fraudulenta Medea, hoc pretiosissimum æternitatis pignus, in perniciem suæ Patriæ, impietate, prodatur sceleratâ. Literæ Caduceus ille cælestis sunt, quo non palantes animæ euocantur Orco, & exangues animantur vimbres; sed miseri mortales in profundas vitiorum lapsi voragines, ad absolutæ virtutis retrahuntur cultum. Professores sunt huiusce Caducei Mercurij, qui hoc cæleste munus hominibus applicant, & à superis ad homines vices obeunt nuntiorum. Literæ Prometheia illa virgula solari collucens igne sunt, quâ informes & incompositi naturæ partus calefacti, in noua Orbis miracula transformantur. Professores sunt huiusce Virgæ baiuli, qui eius vsu, præ natiuâ ignorantix caligine emortuis hominum animis, nouam pulcherrimam afflant venustatem. Literæ deniq; fertile Amalthææ cornu sunt, quo non ab Ætholis tan-

tum, sed ab omnibus omnino populis, deploranda bonarum mentium pelli-
tur sterilitas. Professores sunt huiusce boni largitores Hercules, quibus Or-
bis debet, quod fecundam metit ingeniorum messem, quam in horreo boni
publici condat & deponat. Quid igitur est, volumus fontes perenni decur-
su, inexhaustos emolumentorum riuos, in bonum publicum deriuare. Ca-
nales ergo fontium à situ, squalore, à miserabili paupertate, liberalis dexteræ
subsidio repurgemus. Cupimus hos hortos delicatos subministrare flores,
ex quibus texantur corollæ, capiti Reipublicæ, ad summum ei⁹ decus impo-
nendæ. Tutelares ergo hortorum Diuos, non (vt ait Poëta) farre pio &
plenâ veneremur acerrâ; sed liberalitatis benignitatîsq; beneficâ operâ, in
omnes talium hortorum curas & vigilias erigamus excitemus. Desidera-
mus raras hæc & lucentes stellas, secundo terris impetu continuo Orbes
obire suos, vt arcano influxu, beatam in Rebuspublicis fundant fecundita-
tem. Motricum ergo intelligentiarum fatigatum, procuratis nouis fortunæ
subsidijs, instauremus motum; ne frustra viuidam promptitudinem, agitan-
dis hisce sideribus exerceant & impendant. Expetimus Palladium istud
nunquam hostili in prædam cedere amentia, esseq; inexpugnabile Patriæ
felicitatis robur, & æternum munimentum. Excubitores ergo eius benigno
gratiæ foueamus sinu, vt desideratis suæ diligentia perfruentes fructibus,
quietem suam publicæ posthabeant felicitati. Optamus aureum istud vel-
lus, suæ opulentia largis auxilijs, omnes hominum cumulare status. Argos
ergo centoculos honestissimis pensionibus largisq; tributis in somnum rela-
bentes recidentisque stimulemus: vt gloriosa amoris publici æmulatione,
ducti, in omnes laboris & contentionis sustinendas molestias, tædiaq; deuo-
randa, generoso animo obdurentur. Vouemus Caduceum istum cælestem,
diues humanæ miseriæ solatium, ac propensionis in nos Diuinæ singulare
indiciu, nunquam è humanæ vitæ consortio tolli; semperq; vitiorum ca-
lamitatumque spectra, è longinquo sollicitos animos terrentia depellere.
Mercurios ergo huiusce Caducei gerulos æstimemus; neq; sua in nos ob-
sequia, parcimoniâ vilissimâ corrupamus. Trahimur studio, vt Diuinus
hic delibatus de cælo & decerptus ignis, afflictis nunquam subtrahatur ter-
ris; sed continuam spargens lucem, debile robur aliorum, in nouam cogat
alacritatem. Prometheos ergo huiusce ignis vsurpatores dexterrimos, non
vt illum indignatus Iupiter, ad durâ Caucasum desperationis alligemus; sed
cum propitiâ potius Mineruâ in cælum honoribus, amicitia, opibus attolla-
mus. Deniq; ardemus vehementer, vt à refertissimo isto bonorum omni-
um cornu, affluens cunctos prosperitatis copia comitetur. Hercules ergo
huiusce copiarum largitores, oblati nostræ studiosissimæ voluntatis obsidibus
muneribus coronemus: vt ita inter Professorum conatus indefessos, no-
stramq; gratitudinem diuisa obligatio, vtrosq; in compendium mutua tra-
hat faustitatis. Alioquin subtrahere fontibus canales; & fluentis CrySTALLI di-
gnitas interibit. Subduc intelligentias stellis; & grauis vmbrarum tristium
contumacia caligantibus terris incubabit. Amoue Palladio excubitores; &
non vnus Vlysses vasserimus corruenti illud surripiet Troia. Procul age ab
aureo vellere excubitores; & Iasonis non vnus scelerata temeritas ei inhia-
bit.

bit. Mercurijs alas & talaria adime; & celeritas eorum spoliata cursu præpe-
 ti hærebit. Abige Prometheos; & Diuinus ille ignis cælesti lucis suæ fulgo-
 re, non amplius emortua membra, in vitales motus animabit. Hercules cornu
 copiarum largitores durissimâ cum Euristheo obrue sorte, & totum mundum
 ad miseram relegabis egestatem. Pari ratione crescenti eruditioni largissi-
 mos subtrahe Mæcenates, benignissimos intercipe Patronos, & omnes hi e-
 minentes in virentibus Parnassi collibus eruditorum flores; non secus ac
 quondam ad obitum formosi Adonidis Pæstana Rosaria, contabescunt. Vi-
 derunt hoc omni ætate prudentissimi & verè inclyti Heroës, ac proinde,
 cum cæleste in terris regendi munus sustinerent, bonarum artium Numi-
 na effusissimè coluerunt: & quasi par gloria Imperij atq; studiorum esset,
 eandem ad continendos in officio populos, & ad excelsis ingenij dotibus e-
 minentes viros exornandos, manum porrexerunt. Noluerunt latere raras
 istas & splendentes faces, in obscuræ sortis nocte; sed vt tantò clariùs nitidissi-
 mum suum iubar spargerent, producebant illas in apertum lucis spectacu-
 lum, purpurâq; & ostro lucem earum è propinquo intendebant. Non passi
 sunt laboriosas istas apiculas sterilia peruolare prata; sed vt tantò copiosius
 liquentia mella in publicum inferrent alueare, cultiora ipsis rura suppedita-
 bant, laxiores domos ædificabant, & ambitiosum illis fortunæ choragium
 explicabant. Non sustinuerunt suauissimarum istarum lusciniarum, musi-
 cum multis miserijs intercludi spiritum; sed vt tantò iucundiùs amaniùsq;
 certis inflexos legibus sonos molirentur; ederentq; mirabiles illos concen-
 tus, beatissimamq; Harmoniam, quam nunc posteritas ceu Orpheum me-
 los, aut Amphionis Lyræ aure bibit sitienti; aures earum multiplici vo-
 cum sono, oculos exquisitissimis spectaculis, palatum saporibus apparatissi-
 mis delectabant. Talis olim fuit Philippus ille Macedonum Rex pruden-
 tissimus, qui Atheniensibus quàmuis meritò iratus & infensus, semper ta-
 men sibi ignoscendum dicebat; quòd negaret illud theatrum gloriæ suæ, do-
 ctissimis eo tempore abundans viris, sese excisurum. Talis tanto Parentes
 Maior filius ALEXANDER ille omnium, quoscunq; sol aspexit Regum bellico-
 sissimus victoriosissimùsq;, quem non tam innumeri triumphi; quàm poti-
 ùs integra doctissimorum virorum agmina, per vniuersum secum orbem
 circumducta, stupendisq; thesauris locupletata, mansuris æternitatis fastis
 intulerunt. Talis Ptolomæus Soter Rex Ægypti laudatissimus, qui Stilpo-
 nem Megarensē, Darius præclarissimus Monarcha Persarum, qui Hera-
 clitum, Artaxerxes, qui Menandrum, Polemon Atheniensium Dux, qui Xe-
 nocratem, Epaminondas Thebanorum Princeps, qui Lysidem, Pyrrhus E-
 pyrotarum Rex, qui Cyneam, Augustus qui Liuium, cum suæ familiaritati
 insuetâq; felicitati admouissent, eadē operâ suis Rebus publicis optimâ se-
 præsidia, optima commoda ornamentaq; paraturos iudicarunt. Etiam, quod
 iure quispiam inter stupenda prodigia ponat, crudelissimi quiq;, dirissimi,
 immanissimiq; Tyranni, Phalarides illi Agrigentini, vastæ voragine vitio-
 rum: Antigoni Macedones, monstra quædam teterrima sceleratæ improbi-
 tatis: Tiberij Imperatores, ex omnium nequitiarum fraudumq; importuni-
 tati conflati: Nerones Matricidæ, pestes quædam communes & Phaëtontes

generis humani: Antonini Caracallæ, spongiæ cognati etiam & fraterni sanguinis sitientissimæ (ne solos tantum viros virtute excellenti præditos in hoc Mæcenatum numeremus censu) hac se tamen vnicâ virtute in posteritatis gratiam insinuare voluerunt: si quàm maximè literas literatosq; innumeris sibi beneficijs deuincirent; si viros doctrinâ eminenti elegantiaq; literarum perpolitos, carius omni auro omniq; thesauro æstimarent; si eorum tenuitatem opportunè creberrimis donis subleuarent. Tantum enim ex literis in Respublicas commodi, tantum splendoris, tantum maiestatis effunditur, vt illi ad perniciem innocentium virorum nati, qui sanguinolentæ Tigridis instar omnia cæde, stragibus, lacerationibus horrendis fædabant, conspurcabant; quibus homines perdere, iocus & ludus quidam fuit liberalis; crederent omnia se damna, perniciēs, incommoda faciliè Rebuspublicis resarcituros compensaturosq;, si saltem literatorum excellentia ingenia suæ cultu humanitatis, ad iuuandum commune bonum allicerent, prouocarent. Et certè vt ad ipsos deueniam literatos, quispiam ne arbitretur doctissimos illos viros, qui ingenij sui sublimitate admirationem omnibus sæculis, suæq; confessionem magnitudinis extorserunt, sapientiam illam suam perficere, vastissima sua pectora magnarum facta cogitationum, omnis doctrinæ censu stipare potuisse: nisi insigni suorum Patronorum liberalitate subnixi, liberrimas suas mentes in immensum scientiarum pelagus immerisissent? Minimè gentium. Munificentia Patronorum illorum ardentissima studia, in omne genus eruditionis impulit: munificentia illis incredibile sciendi desiderium auxit: munificentia iniecit odium ignauia, peperit gustum cognitionis, insinuauit contemptum difficultatis, aluit & confirmauit laborandi in studijs sedulitatem. Hæc suauissimos pangendi carminis artifices, per multas impedimentorum asperitates & salebras, in altum & inuium Parnassi duxit collem, Musarumq; sibi pronos fauores, & ipsius præsidis Apollinis conciliauit plausum. Hæc disertissimos Oratores in Eloquentiæ, manu quasi protractâ, fastigium traxit: ibidemq; victricibus lauris promerentium capita cinxit, & virenti myrtho tempora impediuit. Hæc solertissimos Philosophos in ipsum abditum Democriti demersit puteum, & viuētes adhuc suauissimæ contemplationis recreatos pastu, è viuētiū numero segregauit; in Academicâq; vmbracula, Lycea, viridariaq; amænissima cupientes egit. Hæc subtilissimos in astra duxit syderum obseruatores, per naturæ illos lucentes globos & insigne noctium spectaculum, sidera in aperto superlabentia, mundi; in præceps semper acti choreas, eorum curiosum aspectum circumtulit. Hæc omnis sapientiæ, omniumq; bonarum artium Antistites, suæ quietis commoditatilq; securos, in commodum venturæ posteritatis omniumq; educauit sæculorum, vt seipsis maiores effecti, illa nobis sapientiæ præcepta, & sublimes voces inusitatâ animatas eloquentia profunderent, quas nunc quisquis legit, plenus ingentis fiduciæ, & ætherico ac erecto honesti calore incitatus:

Cellior exurgit pluuijs, auditq; ruentes

Sub pedibus nimbos, & cæca tonitrua calcat.

Quomodo verò quæso aliquis poterit tot res, tam varias, tam distractas,

tam

tam confusas, quales in literis reperiuntur, voce, memoria, consilio, ingenio
sustinere: quomodo quemadmodum certis inter se limitibus distinctæ, ac
sejunctæ sunt; iudicio etiam suo discernere: quomodo elegantis styli peni-
cillo ad posteritatis memoriam delineare: quomodo rationibus validissimis
fulcire, firmissimis argumentis stabilire: nisi prius parauerit sibi vitæ præsi-
dia, quibus instructus armatusq; strepentes circa se tot egestatis minas audi-
at & contemnat, quibus fretus confususq;, cum naturæ desiderijs difficillimo
certamine deprælietur & triumphet, quibus tectus munitusq; dolores se cir-
cumfiliantes cernat & compescat, quibus sublatus eleuatusq; videat miseri-
arum tempestates rupturas breui nimbum suum, ipse tamen in altissimâ se-
curitate consistat conquiescat. Quomodo naturam cum Stoicis vincet,
cum Cynicis excedet, cum Peripateticis in consortium omnis æui incedet,
cum Academicis egredietur humanæ imbecillitatis angustias; cum Socra-
te soli sapientiæ vacabit, cum Zenone, Pythagora, Democrito, alijsq; nobi-
lissimarum familiarum ingenijs, felicissimâ festinatione discurret, per omnes
latè patentes scientiarum campos: quem molesta pauperies solitudine
conficit, cui rerum penuria somnos rumpit, quem durum telum necessitas
solo allidit, quem ne plura loquar, rerum omnium indigentia non à limine
tantum sapientiæ; sed ab oculis humanis subducit, abditq; in latebras, & in
illuie domesticâ, tristibus fatigatum curis derelinquit. Quomodo deniq;
omnium hominum ad leges bonè viuendi reuocabit vitam, impetus animi
spontè ac voluntate suâ præcipientes in omne flagitium, freno pudoris illibati
reprimet, affectiones omnes temperatas, & menti obedientes esse compel-
let. Pauca multa; quomodo faciet vt Ciues Patriæ, depulsâ omnis libidi-
nis impurissimæ tetrâ caligine, omnes suos successus prosperrimos, omnem
Reipublicæ quietem, securitatem, integritatem, vitam deniq; illam, quam
nulli temporis cancelli, nullæ longissimæ definiunt ætates, nulla vasta sæcu-
lorum includit profunditas, in iustitiæ cultu, in decoris honestate, in virtutis
robore, in mansuetudinis lenitate, in moderationis venustate putent consti-
tutam: hæc inquam omnia quomodo faciet is homo, quem duræ compe-
des ac vincula detinent inopiæ, ne se publicis impertiat vsib; cuiusq; tam du-
ro iugo Diuinæ particulam auræ oppressit egestas, vt sub eo ne possit quidem
respirare. Crede mihi, quisquis es, in angustijs, in ægritudine, nequaquam
est literis locus: & sapienter antiqui solem omnis lætitiæ datorem Musis præ-
posuerunt, vt innuerent assiduis doloribus patientiam animi oppressam
obrutamq;, miserijsq; suis velut denso nocturnæ caliginis horrore consepul-
tam, parùm commercij cum Musis habere posse: quemadmodum qui cum
onere incedit, morosa sæpius format vestigia, labitur facillimè, moratur
creberrimè; nec in editum aliquod culmen, nisi ægrè, multoq; cum anhelu-
tu, fessa languentiaq; membra promouens, gressum profert. Quantum
ergo eos in publicum bonum conferre statuemus, qui Professorum attollunt
ingenij sublimitatem, ornant industriam fortunæ muneribus, liberant & ex-
soluunt à molesta rei familiaris curâ sedulitatem. Quantum etiam nostrum
Nowierscivm animo vidisse decernemus, qui ingenti aliquo pignore Rem-
publicam sibi obstricturus, hoc sui in Patriam amoris æternum exstare vo-
luit.

luit monumentum, hoc suæ indicium bonitatis, hoc lumen prudentiæ, si in Musarum delubris opima Ditis spolia suspenderet; si iuxta Apollinis aras vi-
rentes beneficiorum palmas, vt olim in Delo Insulâ factum legimus, sæcu-
lis innumeris duraturas plantaret; si Musæis Professorum, non vt olim Pom-
peius Magnus in honorem fecerat Possidonij, laureatos fasces submitteret;
sed suas opes affunderet copiosè.

Sed cur in ACADEMIA hoc insigne animi sui in literas inclinatissimi reli-
querit documentum, mirum fortasse cuipiam videbitur, quisquis sparsas
per Poloniam vniuersam, deductasq; literarias istas colonias, curioso oculo
circumspiciens, ACADEMICAM sibi fortassis non magni faciendam putabit
paucitatem: ego autem contendam potius, vel ideò maximè lucem quan-
dam maiore amplissimæ gloriæ ex NOWIEYSCIANA liberalitate effulgescere,
quòd per eam literarum ACADEMICARVM litatum est commoditati, quòd ea-
rum potissimùm consultum dignitati. Cuperem hæc ab alio prædicari, cu-
perem non à me solum, qui minimus Almæ Matris filius sum, in sermone
poni. Subuereri enim debeo, ne etiamsi vera dixerò, alij me nimium lau-
dum domesticarum præconem, alij non satis æquum alienæ virtutis censo-
rem arbitrentur. Sed dicar sanè & iudicer alijs vt fuerit collibitum; ego
dum mihi ipsi probatus, sub iudice conscientia non vacillabo, non admo-
dum curabo, si quid mihi falsi cuiuspiam maleuolus affinget sermo. Par-
est vel meæ existimationis periculo ACADEMICA in Rempub: Poloniam me-
rita memorari, vt NOWIEYSCIANÆ magnitudo liberalitatis, magis etiam ab
omnibus cognoscatur. Quid igitur est, in quo tantopere ACADEMIÆ in hoc
florētissimum Regnum spectari velim, fidem, laborem, boni publici cha-
ritatem. Audiat quisquis est hospes domestici moris, & in rerum Polona-
rum ignoratione versatur, audiat etiam quisquis diro malignitatis veneno
suffusam mentem gerit: & si nobis antea sinistri aliquid cuiusquam conui-
tia affricuerunt; si quas labe & maculas cuiusquam adpersit suspicio, æqui-
ora sibi de nobis iudicia putet facienda. ACADEMIÆ primùm Respublica
Polona debet, quòd pristino deposito horrore, Sarmaticâq; multorum iacta-
tâ diçterijs barbarâ cruditate, cum cultissimis potest nationibus in apertum
ingenij certamen deuenire; aliquas etiam elegantia Latini sermonis vsq; ad
extemporaneam dicendi facultatem superare. ACADEMIÆ debet hunc pul-
cherimum Polonæ libertatis gustum, quâ maximis etiam Principibus desi-
derium sui & reuerentiam Respublica fecit, quâ omni postposito prælio, inte-
gros & intactos populos, ad eandem legum traxit societatem. Antiquæ in-
stitutioni adscribendus est aureus ille Polonorum sine fuco candor, blanda
sine rigido supercilio virtus, seria sine contemptu alterius eruditio, sincera
sine simulatione pietas, consummata sine cruditate morum grauitas probi-
tasq; quibus aliarum gentium, harum virtutum non æquè feracium, inti-
mos amores & affectus merueramus. Antiquæ fuerunt institutionis Szy-
dlowecii, Melechii, Tomichii, Ociescii, Tarnowii, Lybranscii, Tęczynii, O-
solinii, Samoscii, alijq; innumeri bello paceq; clarissimi Viri, quorum Di-
uinis consilijs Respublica debet, quòd adhuc stat pro vallo Europæ, excu-
bens pro vicinarum gentium quiete, contra ferocissimorum hostium im-
manitatem;

manitatem: Turcicamq; vastam ex tot Imperiorum rudëribus substructam potentiam, non oppositis aggeribus, structisq; manibus; sed fortissimorum Ciuium pectoribus, sed indomito robore, sed audacissimâ fortitudine sistit & auertit. Antiquæ institutioni in acceptis referenda est hæc Latini eloquij puritas, hic animorum nitor, hæc doctrinarum omnium exquisitissima varietas, hæc exactissima iudiciorum censura, hic auiti moris conseruandi feruor, & quidquid in Polonia magnificum videtur & stupendum. Ex quo tempore in Poloniam neglectâ veteri institutione introduci ceperunt exoticorum studiorum promiscuæ vsurpationes, ex illo tempore fluere ac retrò sublapsa referri, spes Lechidûm, fractæ vires: ab illo tẽpore intuemur passim illibatum pudoris decus interire, intaminatæ honestatis studium restingui, victricem exultare indomitam turpitudinem, pro sapientiâ inconsultam temeritatem, pro fortitudine languidam imbecillitatem, pro temperantia effrenatam libidinem adhiberi, simplicissimam miserè vexari innocentiam: laxatisq; pudoris & verecundiæ vinculis, & morum sanctitate & castimoniâ profligatâ, omnia sic administrari, vt quæ erant ad salutem Reipublicæ constituta, ad perniciem eiusdem conferantur. Neq; vero ego (pace hoc aliarum nationum dicere liceat) video cur magnopere exotica studia sumptu tam immenso, periculis tam præsentibus, tædijs tam molestis, multis, grauibus, itineribus tam longinquis, dissitis, asperis, sint quærenda. CROMEROS quidem ego, SOCOLOVIOS, ROMERIOS, SCHONÆOS, GORSCIOS, ORICHOVIOS, VARSZEVICIOS, PATRICIOS, VITELLIOS, CYNERSCIOS dum lego, non admodum exterorum Muretos, Sigonios, Bembos, Manutios, Sadoletos desiderem; sicut nec in Historia neruose scribenda, Thuanum prætulerim PETRICIO; aut calminum elegantiam Ronfardum Simonidæ; vel multarum rerum peritiâ scriptorum multitudine, pretio, elegantiam STAROVOLSCIVM, LIPSIO; aut Hispanum Osorium, Gollicio. Ad extremum sit hîc idem, qui apud externos literis honos, eadem laborantibus pretia, & amænissima Italicorum ingeniorum lepiditas, subtilissimum Hispanicæ contemplationis acumen, excitatissimus Gallicæ eruditionis vigor, robustissima Belgici eloquij maturitas, in nostram Poloniam nullo negotio immigrabunt. Exposui breuiter ACADEMIÆ in Patriam merita, reliquum est, vt Patriæ etiam in exornandâ ACADEMIA studium & propensionem videamus. Non faciam iniuriam maximis virtutibus, & commemorandis in omni posteritate Heröici animi exemplis Tuis Diue IAGELLO, quem verè Patrem, Fundatorem, Auctorem suum literæ fatentur ACADEMICÆ, si vt integerrimæ à me satisfiat veritati, de Tuâ in nos insigni liberalitate, aliquid cum ingenuo candore, licet non absq; debitâ reuerentiâ in medium attulero. Fatemur equidem nos omnes liberalitati deuinctos Tuæ, omniq; nexu obligatos; quòd hoc Lyceum à primis fundamentis felicissimis auspicijs, insigni totius Reipublicæ emolumento exiisti. Tibi in solidum debemus transcribimusq; omnia plena gloriæ, plena illustris famæ, quæcunq; ex hac studiorum erectione ad nos Tuamq; posteritatem decora promanarunt. Tua illa intermoritura nunquam laus est, quòd cum alterâ manu fortissimorum militum inuictas phalanges, ad iuratos Regni huius hostes debellandos ordinares; alterâ sapientissimorum Vi-

rorum ad profligandam barbariem, magnum numerum induxisti. Tuum illud singulare præconium, in ipso sacro Musarum penetrali, ædrinis tabulis insculpendum; quod Herôicâ Tuâ munificentia ostendisti primus, frustra Sarmaticæ indoli, incultæ barbarici horrorem obiectari, quæ florētissima- rum etiam nationum exertis ingenijs, in hoc elegantiore doctrinæ circo, tam facile potest comparari. Sed tamen si dixerò minùs à te literis præstitum ACADEMICIS, quàm ut à Regiâ Tuâ munificentia, contra secuturi temporis injurias munirentur defenderenturq; , & quid quæso à me ad Tuam gloriam imminuendam prolatum quispiam affirmabit? Feceris enim multa pro illis felicissimis temporibus, quibus rerum omnium in Polonia summam vilitatem, modica rerum pretia demonstrabant, quibus leui ære facile quiduis in possessionem veniebat ementium: nunc cum pretia rerum creuerunt, immensum, cum nonnisi maximis annona conquiratur impendijs: exiguum certè id esse cogimur iniquitate temporis profiteri, quod antea fuit amplissimum. Secuta est postea aliquorum priuatorum hominum liberalitas, qui in hoc Athenæo tyrocinij depositi, & educationis suæ peractæ memores, tenuitatem illius suo demenso recreârunt. Nondum tamen usque adeò dilatauit se cuiusquam benignitas, ut omnes vacuas necessitatis nostræ lacunas impleret, querendiq; nobis de nostra egestate, omnem præriperet facultatem. Sicut enim si quis ædificium mole ipsâ stupendum, structurâ magnificum, proportionē æstimandum, elegantia & concinnitate admirandum, immenso sumptu extruxerit, rem quidem ille maximam effecerit; nisi tamen illud crebrò interpolauerit recôcinnaritq; nisi hiantes eius rimas impleuerit, nisi fulcris & adminiculis firmissimis vergens in ruinam fulciuerit sustinueritq;: non multum ille vtilitatis sibi alijsq; inde parauerit: multorū enim annorū labores, vn° tandem dies sparget & dissipabit. Ita certè passim in antiquis foundationibus fieri videmus. Nam & illæ quoq; nisi nouis instarentur auctionibus, nisi recentibus tempestiuè reficiantur censibus, ad eas minutias lapsu temporum deuenient, ut moderatissimi cuiusq; frugalitatem nequeant ultra sustentare. Itaq; ob eam ipsam reddituum penuriam, magnum in discrimen literaria res veniebat. Quid enim si diutius in venis ac visceribus ACADEMIÆ hoc tantum incommodum latuisset, neq; semel profligatâ Professorum tranquillitate, eos vnquam erigere caput permisisset: an occultis tantum deprehēdebatur indicijs; non etiam manifestis colligebatur argumētis, eò res fuisse deuenturas, ut Professores bonarum artium aucti ab excubijs literarum, cum suum locum cum honestate tueri non possent, id suadente necessitate fuissent suscepturi consilij, quod sibi obiectus necessitatis metus extorqueret. Itane verò: aliqui delicati Phæaces Vlyssis socij, cum Lotophagis, in omnium rerum affluentia nihil agentes felicissimam contriuerint ætatem; aliqui pigerrimi Therisitæ, procul ab omnibus laboribus, in opulentæ vitæ suauitate, sumptu publico, periucundè fuerint versati; aliqui ignauissimi & luxu maridi Vatiæ, nullâ aliâ re, quàm otio noti, in maximâ rerum omnium copiâ consenuerint; his Respublica suos honores, his præmia, his exequendam auream messem, his pingues Alcinoi mensas, his exquisitissima Calypsus obsonia profuderit, prædegerit, ministrauerit:

Professores

Professores bonarum artium, quorum bonis publicis defudat industria; omni suarum miseriarum carebunt perfugio; soli repulsam bonæ fortunæ patientur, soli uiuent alligati durissimæ paupertati, soli cum ob receptam in domesticum cōsortium frugalitatem, superfluorū sibi vsum præciderint, à necessarijs quoq; arcebuntur? Sed cohibeo erumpentem latius se efferentis impetū styli, ne in eo ipso, in quo exultat & triumphat Oratio mea, importunæ se querimonix immiscentes, gaudij nostri magnitudinem interrumpant. Ad nostrum potius redeo NOWIEYSCIVM, à quo me contemplatio præsentis literariæ felicitatis abstraxerat, illi reliqua hæc vox seruiat, cuius beneficio factum est, ne iam misérias vltra nostras incusemus. Hoc enim motu atq; penuriâ rerum omnium, cum penetrasset in intima Lycei huius, obseruator viri prudentissimi oculus: cognouissetq; eam intus latere tenuitatem, vt expeditâ mente & liberâ, & supra angustias rei familiaris positâ nequaquam possent Professores, totas eruditæ negotijs dispungere horas; quod durum paupertatis onus, portentosis ingentium curarum machinis quæta concuteret pectora: nequaquam sibi quiescendum duxit, nisi hunc fontem bonarum artium, hoc caput Polonæ Eruditionis, hoc cor viuacioris doctrinæ, hanc feracissimam omnium commodorum arborem, suâ ipse beneficentiâ promptissimè coronaret. Prudentiæ suæ putauit Scholam hanc principem, contra influentes inferentesq; semet malignæ sortis æstus tueri; Prudentiæ extremam penuriam in ipso aditu coercere: Prudentiæ sanctissimorum stirpis IAGELLONÆ Regum opus hoc singulare, eximiumq; sui in Poloniam amoris symbolum, à lapsu & miserijs præseruare; Prudentiæ Eruditioni toto Orbe notissimæ, diuturnisq; in Patriam meritis patrocinari: Prudentiæ difficillimis afflictæ fortunæ turbinibus, vexatam Professorum sortem componere; Prudentiæ deniq; meliora ingenia, in hac laboriosâ bene merendi defigere statione, vt suorum securi commodorum, nullis de egregio hoc docendi Officio, nascentibus impedimentis dimoueri possint. Prudentiâ suâ admirabili id vnicum agere visus est, vt Professores, non quidem viscatis fortunæ muneribus saginarentur; sed tamen implerentur: non quidem à diuitijs obsiderentur; sed tamen iuuarentur: non quidem ab opibus distinerentur; sed tamen à penuriâ non implicarentur: non quidem splenderent; sed tamen non obsolescerent: non quidem luxuriæ suæ Apicij prodigiosis impensis, aut Nomentani pudendo sumptu parentarent; sed tamen hilarescerent, quiescerent, satiarentur, consisterent; ideòq; hæc tantum Plutonis sacra colerent, ne tenuitas fortunæ vigorem omnem industriæ fatigaret. O mentem Viri Maximi omnis prudentiæ non scrinium, sed penu feracissimum! ô animam omnis consilij non arcam, sed promptuarium ditissimum! ô pectus omnis iudicij, non receptaculum, sed officinam capacissimam. Si alijs Vir iste maximus literarum domicilijs, suam benignitatem commodasset, fecisset ille præclarissimè; sed tamen minùs, quàm quod modò ab illo factum in laude ponimus, præstitisset. Nam quid sunt per vniuersam Poloniam, alia literarum domicilia? sunt scaturigines omnes pulcherrimo flexu ad bonum commune profluentes. Scaturigines implere fonte interim præterito fuisset inconstitutum. Quid sunt aliæ in hoc Regno humaniorum lite-

rarum Palæstræ? sunt membra excitatissimo semet doctrinæ motu ad publicum bonum agitantia. Membra fouere capite interim neglecto, non fuisset circumspectum. Quid sunt aliæ in hisce Regionibus Scholæ? sunt venæ meliorem vigorem in totam Rempublicam dispensantes. Venas meliori imbuiere succo, corde interim derelicto, non fuisset tempestiuum. Quid sunt deniq; aliæ nostris in nationibus eruditionis Officinæ? sunt rami, à quibus in totam iuuentutem diffunditur cognitio liberalis. Ramis limpidos latices affundere, radice interim arescere permittenda, parum fuisset fructuosum. Quibus nunc omnibus à NOWIEYSCIANA liberalitate, efficacissimo sanè euentu est succursum. Dum enim impleuit fontem, ne scaturigines quidem pigro & segni flexu siccas ripas deferent: dum capiti prouidit, ne à membris quidem viuacissimus recedet vigor: dum cor recreauit, nec venas etiam damnosus nutrimenti defectus occupabit; dum radicem lenius irrorauit, rami quoq; luxuriabunt felicius, laxiusq; in omnes partes diffundentur: dum ACADEMICVM delegit campum, in quo sua liberalitas excurrere benignius, & ab omnibus cognosci posset; etiam reliquæ Scholæ multò feliciori successu ad singularem literarum cultum, decusq; ferri videbuntur. Quantis ergo nunc Diue IAGELLO in illo caelesti Capitolio, in quo consortio simillimarum tui mentium incredibilem in modum oblectaris, quantis nunc credemus te incedere lætitijs, inuentum fuisse vnum è millibus NOWIEYSCIVM, qui pulcherrimum hoc opus à Te conditæ ACADEMIÆ, iam iam lapsu temporis inclinans Heroicâ suâ munificentia sustineret gloriosè, foueretq; viros, qui non sibi, sed vniuersæ semper vixerunt Reipublicæ; neq; sibi fructus ex suis laboribus amplissimos, sed toti Patriæ quasiuerunt. Gaudetis & vos aliæ beatissimæ mentes, in illa immortalî Patria, vbi certus vobis & definitus est locus, vos magnanimi NOWODWORSII, vos disertissimi TYLICII, vos præclarissimi ZADZICII, vos spectatissimi VLADISLAWSCII, ab hoc vestræ laudis insigni successore & æmulo, confirmari beneficia vestra, quibus Athenæum istud Cracouiense prosperrimo successu dotastis, ornauestis, promouistis. Gaudet credo & omnes, quotquot sunt huius loci alumni & discipuli, nondum in tenebras ire ACADEMICAM dignitatem, non dum deficere hunc fontem, qui duobus alueis virtutis & doctrinæ, in bonum publicum plenus fluxit. Neq; verò te Alma omnis sapientiæ dispensatrix, non par est in omnem diffundi hilaritatem, tristibus exercitam curis exuere solitudinem, & in noua gaudia, seueris assuetam cogitationibus impellere mentem. Quod enim munus, quam grata eruditionis tesseram laboriosi Professores Tui, Tati Dotatoris gratiæ non refundent? quod non exsoluent officium tantis beneficijs? quæ se omni libra, omni nexu bono publico obligant & obstringunt. Agnoscent illi semper se fore NOWIEYSCIANÆ liberalitati obnoxios, semper se deuinctos creditori suo concedent; atq; adeò industriam literis, sedulitatem laboribus, eruditionem pietati, omnia exculta mentis decora, bono publico commodabunt. Nefas esse ducent, vt quis aluminorum NOWIEYSCIANÆ liberalitatis veterno socordia obrigescat in ea Palæstrâ, in qua labor & industria, vocis & ingenij, contentiones pulcherrimæ, aternum defixam habent stationem. An verò antea in circumsilientibus vitam suam tot incommodis, in medijs

curarum

curarum impendentium tempestatibus, in molestis curandæ rei familiaris cogitationibus, vicerunt tamen omnes difficultates, subegerunt ingenium vsu acerrimo, collegerunt sibi incredibilem doctrinæ vbertatem, neq; imbelles aut otiosi, capacissima omnis doctrinæ capita sua, emeritis lauris coronarunt? Nunc dùm sibi singulare NOWIEYSCII beneficium viam aperit & munit, ad maturiorem frugem atq; ingenij concertationem: simulabunt ineptum animi languorem, vocis & ingenij præferent tenuitatem, deside- que se in sapientiæ castris milites probabunt? Ibimus tantò sublimius ne despera bona Mater, affundemus in sublimi sedentibus Musis cuncti sudores nostros, opponemus irruenti ignorantia scutum laboris nostri, studebimus nobis iam tandem paciores facti congregare diuitem ingeniorum censum; dumq; ita omnia effingemus, vt in omnibus nostris literarijs occupationibus, digni niteant eruditionis apparatus, integras mortalium ætates tuis Alma Mater implebimus laudibus, teq; sublimibus spectandam meritis toti Orbi proponemus. Ex quo iam sequitur, quanta etiam in eo ipso prudenti consilio, Illustri NOWIEYSCIO, laus sit tribuenda; qui communibus studiis in ACADEMIA, ad pristinum statum attollendis, suarum maiorem partem impendit facultatum: cùm hoc suo facto non modo vetera Reipublicæ bona luce meridianâ clariùs integra videamus conseruata; verùm etiam certiori in posterum præiudicio, tantò ampliùs, tantòq; vberiùs noua cumulanda.

Intelligo me diutiùs, quàm fortasse par erat in hoc loco fuisse commoratum, dum nitor ostendere optima Reipublicæ adminicula nostrum parasse NOWIEYSCIVM, cum ACADEMICAM suâ liberalitate & gratiâ, dignam censuit mediocritatem, in eamq; potissimùm exornandam sumptus suos erogauit. Sed nimirum, tribuendum erat aliquid affectui meo in Almam Matrem, quam ab hac Heroicâ NOWIEYSCII largitate, confectam senio suam vetustatem confido deposituram. Conuincenda etiam erant obtusa, & detorta iudicia, quibus placet facundiam inopi linguâ desertas artes deplorantem relinquere destitutam. Nunc iam ad NOWIEYSCIANI beneficii alacritatem, gratissimi styli officio commendandam, resumpto quasi spiritu eloquentiæ progredior; à qua me longiùs prudentia fuerat remorata. Quæ verò illustrior potest beneficii reperiri commendatio? quàm ita illud largiri, vt cùm multum, cùm opportuno tempore, cùm indigentibus contuleris: nullo tamen feruentiore precum studio, nullis importunis flagitantium rogationibus, huc adductus videaris. Largiuntur multi beneficia pretio æstimanda, necessitate opportuna, amplitudine laudanda; sed ita largiuntur, vt rogantium verecundiam demittant ad genua, vt supplicum vota diuturnâ consumant expectatione, vt spes egentium longissimâ morâ protrahant, vt ipsarum magnitudinem gratiæ tristi supercilio corrumpant, vt ardentissimis diuturnæ interpellationis facibus admotis, magis magisq; inflammentur. Qui verò ita largiatur, vt præcurrat officioso humillimas preces affectu, spes omnes celeri anteuertat anticipatione, occurrat ipse spontè venienti miseriæ, nec sibi sustineat diuturnis postulatis manum quasi iniici, rarissimus est, vixq; eum vt Phœnicem quingentesimus producit annus. Difficile quippe est, ita omnes explere bene merendi articulos, ita nôsse quid in beneficentia

fit primum atq; vltimum, ita ad leges benè formatum institutumq; esse charitatis, ita in opulèto amoris versari gazophylacio, vt cum impèderis beneficium, etià petendi graue nonnunquam animis ingenuis remittas onus, nec quidquam in beneficio tuo committas, quod non sit gratuitum. Quo in genere, mirum, quàm se singularem artificem noster præstitit Nowieyscius. Non enim à nobis diuturnis est exambitus votis, non crebris in hoc liberalitatis suæ theatrum præclarissimum euocatus suspirijs, non mellitis delinitus blandimentis, non promptis conciliatus officijs, non quæsitis impulsus, plectusq; laudibus: sed cùm in hoc munificentiae agro, opimam segetem spargere constitisset, præcurrit etià vota nostra, tantùmq; se nostris commodis indulgit, vt prius eum beneficum senserimus; quàm in animum nostrum hæc vnquam cogitatio descendisset. Scilicet animus ille verè sublimis, verè beneficus, amoris nostri perpetuò calebat igne, quem accensum imo pectore cùm teneret; tantò etià magis declarauit, tantò clariùs patefecit; quantò magis nos in silentij tenebras, & vmbra vidit recessisse. Sciebat ACADEMICAM verecundiam in petendo, suo sæpiùs incommodo esse modestiorem: probè perspectum habebat, tantum esse propè innatum Professoribus latendi studium, vt pauculo hoc contenti, suâq; patientiâ inuoluti viuere malint; quàm cuiquam importunè, vt suæ consulat tenuitati, supplicare: didicerat suâ ipse experienciâ, animas istas nobiliores, ad doctrinam à natura subordinatas, dum hoc vnum agunt, vt in Heliconis arduum montem magno nisu ascendant, cogi sæpiùs Plutonis ædem præteruehi, nec nisi eam à longè, vixq; semihiantibus oculis prospectare. Ergo tempestiuè obuiandum ratus antequam, antiqua hæc Ithaca (Collegium minus intelligo) aspera quidem & in saxi inopiæ pendens, viris tamen non infæcunda, magis adhuc incommoda redderetur; effudit in eam copiosissimum benignitatis suæ imbrem; vt tantò magis ad publicam vtilitatem suorum Professorum indefessis laboribus coleretur: iecit ante in hoc plùs quàm Olympicum stadium opimas auri glebas; ne posthac in ipso cursu, vi extorta earum collectio, celeritatem Professorum ad metam bonæ mentis effusissimè properantium retardaret: impendit nobis suas honestissimè quæsitas facultates; ne si simul & Palladi, & Plutoni vacare vellemus, pari infelicitate vtriusq; consortio excluderemur: id deniq; egit, vt ne, affuso opportunæ suæ munificentiae oleo, lucernæ istæ exstingerentur. Arcesilaus nonnunquam (vt doctissimus narrat Scriptor Charonenis) amico pauperi Apelli Chio, & paupertatem suam dissimulanti, ægro autem & ne hoc quidem confitenti deesse sibi, in sumptum ad necessarios vsus; cùm clàm succurrendum iudicasset, puluino eius ignorantis, benè graudem pecuniæ summam subiecit, vt homo inutiliter verecundus, quod desiderabat inueniret potiùs, quàm acciperet. Simili animo, sed maiori inclinatione Illustris Nowieyscius, cùm esset prudentissimus laboris expensor literarij, videretq; non parùm Professores animo concidere: quòd suæ pacis & felicitatis Auctorem penitus reperirent nullum: neq; tamen liberet Orationibus ad præsentem fortunam accomodatis, cuiusquam sibi animum ad benignitatem expugnare, memorabili benefaciendi alacritate, & affectu quodam inusitato exstimula-

tus,

tus, acutissimèq; subodoratus irrepsisse in Musarum Domicilia necessitatem, clandestinis insidijs vsus, sine vlllo strepitu munificentiae, sine vlla pompa verborum, sine prolixâ suae ostentatione voluntatis, prius nos beneficij obstrinxit nexu, prius libertatem nostrorum suauj gratitudinis iugo submisit animorum, quàm nos dulci beneficij spe, pollicitationeq; blanda demulisset. O quem te Vir Maxime dicemus, aut quo sub symbolo, cum itupore tantam munificentiam audituræ posteritati proponemus. Legimus Ægyptum alendis, augendisq; seminibus iactabundam, proprio suo amne Nilo perfusam, nec alio genere aquarum pinguescere solitam, quàm quas ipsa deuexerat, tantis indui segetibus, vt cum feracissimis terris, quasi nunquam cessura certet. Famâ constanti nec fallenti percipimus, arborem quandam, multiplicis vsûs in Insulis Maldiujs nasci, adeo vtilem & fecundam, vt omne genus alimentorum, omne instrumentorum incolis suppeditet. Intuemur ipsi sapius felicissima illa sidera, caelesti semper passu circuire mundum, eiq; laboranti virtute beneficâ, lumine placidissimo subuenire. Cum iucundissimo spectaculo nostris videmus in pomarijs, nostris spectamus in agris, nostris in pratis conspiciamus, matutinum rorem, sub primas antelucani silentij horas, lenissimè per omne genus florum, seminum, herbarum, arborumq; roridas & humentes dispensare gemmas, quibus anteuertens meridiani luminis scenam, arescentibus nouum inspirat vigorem, nouam celsius exsurgendi suggerit firmitatem. Sed nec vllus Nilus, ita se alacriter sterilibus infundit terris, vt non aliquando in iniuriam laboriosorum exarescat colonorum; nec vlla arbor Indica ita suis luxuriat fructibus, vt non creberrimè auidam carpentis frustretur dexteram; nec vllum sidus ita ingentes cæli peruadit tractus, & immensa emetitur spatia, vt non sapius refugiat in tenebras, condatq; diem; nec vllus ros matutinus, ita quamuis profundam suo beneficio seponit noctem, vt non frequentius necessitati æstu consumptæ terræ deneget subsidia, virentiaq; germina relinquât destituta. Tibi hæc in solidum adscribenda laus est Illustris NOWIEYSCI, quod ita alacriter impotentem, acriter se inferentis fortunæ insolentiam, à nobis auertisti, vt nunquam nobis nisi fortè extremis Reipublicæ temporibus (quod Diuina gratia, vt spe non dubia sustentamur, nunquam est permixtura) violentiam aut stragem aliquam sit allatura. Habes id proprium cum splendidissimo cæli oculo, fonte luminis inexhausto, illustri lucis feneratore sole, cuius sacratum os, etiamsi aliqua obscurant nubes, etiamsi aliqui inubrant vapores, etiamsi aliqui eripiunt conspectui nostro imbres: impediunt tamen nunquam; quin non superiores tantum Orbes suis radijs; sed hunc quoq; infimum ambitum terrarum illustret, fructus yberrimos in agris, campis, montibus, aquis, arboribus, metalla in terræ visceribus augeat & excitet. Ita sublimis tua mens ad nostri boni propagationem diuinitus cælo demissa, quantò magis incurrebant multa acerbis fortisq; asperrimæ genera, tantò magis contra ea stetit in concussa, demisitq; se ex summo beneficentiæ fastigio, vt nostram tenuitatem ab asperæ fortis laceratione, fortiteraueretur.

lam verò cum mihi NOWIEYSCIANÆ alacritatis, in hoc tam præclaro

facto recordatio venit in mentem, etiam pietas in aspectabilem sponte suâ se conspectum profert; & aliò diuertentem Suadam meam ad se rapit, minora alia relinquere hortatur. Cuius enim & quàm incredibilis, inusitataq; fuit pietatis, Altricem suam, ex tot impendentium miseriarum flammâ, quantum in se fuit, humeris suis extulisse. Cuius propè dicam intemperiei amoris, hoc tristissimâ sorte deflagrans Palladium, suis manibus in securo collocasse. Cuius pientissimæ humanitatis perpetuâ fundatione, è diuturnâ erutos patiendi necessitate, in meliori necessitatum suarum prouisione respirare fecisse, & in refertissimo beneficentiæ suæ promptuario, desertas nostras Musas reposuisse. Potuisset ille minori impendio, suam in charissimam Altricem testari pietatem; potuisset dulcissimos maturæ virtutis & doctrinæ fructus, quos olim in amænissimo IAGELLONIS decerpisset horto, minori gratitudine rependisse; potuisset Præceptorum suorum fidelitatem, atque assiduas in docendo operas, quibus se ad literarios prouexerant progressus, aliqua licet non ingenti animi grati significatione retulisse. Immo retulerat iam rependeratq; sufficientissimè: nisi quòd ingenti animo, cùm aliquid amplius superesset faciendum, id ipsum quod fecerat leue, exiguum, ac ne æstimandum quidem videbatur. Nam vt à primâ eius iuuentute incipiam, exorienteq; illo die rationis: vbi primum in Almæ Vniuersitatis depositus est gremium, insigniq; in literis profectu, sub institutione Clarissimi, & in omni genere scientiarum versatissimi Viri IOANNIS RYBKOWICII, Sac: Theologiæ Doctoris, eam quæ bonum olim Professore deceret, attigisset doctrinam: illicò suasu eiusdem fidelissimi Præceptoris, vtramq; in artibus ingenuis prensauit obtinuitq; lauream: proposuitq; sibi pulcherrima laboris ACADEMICI exempla, vt ad virtutis exercitium consummataq; eruditionis materiam, honores illos transferret literatos. Hic verò in illa viuendi statione honestissimâ collocatus, ad instâr operosæ apis, ita ditissimo literatæ amœnitatis promptuario, varietate eruditionis, diuersitate inuentionis, multipliciq; elocutionis, venustate fragrantissimo, tam dextrè, tantoq; arcanæ cuiusdam transmutationis successu, ad mirabile illud non mellificij, sed doctrinæ suæ opificium utebatur: vt dignus ACADEMICI Senatus plenissimo honoris & auctoritatis iudicio fuerit visus, qui mellitos eloquij fauos iuuentuti Collegij Posnaniensis, cum desiderio degustandos transmitteret. Vbi cùm excellentes incorrupti animi dotes, perpetuo virtutum & meritorum incremento continuaret, annorumq; quinq; curriculo Professor Rhetorices egregium candoris, laboris, eruditionisq; ACADEMICÆ dedisset experimentum: ita Illustrissimi VENCESLAI LESCZYNI, moderni Archiepiscopi Gnesnensis, literarum nostrarum Mœcenatis & Patroni benignissimi, amorì inhæsit profundissime, vt eum potissimum delegerit, cui veterem generosi sanguinis sobolem, Illustr: PETRVM OPALINVM Palatinidam Posnaniensem, fidelissimè erudiendum committeret, laudatissimi conatus opus egregium nobilissimum Discipulum, ad publicum Regni commodum perfecturo. Quanquam autem plurima Viro Maximo in externis præsertim Regionibus, vbi exiguo fructu, sed valdè quàm præsentì periculo eruditio inuestigatur, obuersarentur pericula, eâ tamen felicitate, eximiam illam Nobilissimæ Domûs propaginem,

paginem, per dissitas Regiones circumduxit, tantâ dexteritate, quod fidei suæ commissum fuerat exsoluit, quâ quidquid vnquam magnanimo corde, aggressus fuit, exitu pulcherrimo visus est confecisse. Redeuntem solenni plausu, complexus Illustrissimus Antistes, gratulari sibi visus est, quod Nobilissimæ Domûs ingentem fiduciam non alibi securius, quàm in ACADEMICI Viri curâ deposuisset; videreq; erat, quantum illi fauisset, dum magno non virtutum, sed donorum quoq; naturalium satellitio stipatum, & incredibili quâdam grauitate ornatum, multarum peregrinarum linguarum eloquio promptissimum, venustissimâ elegantis naturæ præstantiâ, iudicijq; maturitate spectatissimum, peruigili infractæ mentis vigore ad omnia decoratum, honorifico Magnorum Doctissimorumq; Virorum abundantia celeberrimo, Canonorum Varmiensium Collegio inseruit: ne lampas hæc oleo perenni instructa, splendoreq; radians clarissimo, squalentibus tenebris absq; lumine relinqueretur. Tantis ille sublimis dignitatis fultus præsidij, cum iam in luce & aprico omnium versaretur, non eam sibi vitæ rationem incundam duxit, vt vmbra domesticam, inertibus aut infirmis propriam adamaret: sed eò potius euadere studuit, vt multorum oculis obseruatus, in eorum se etiam corda insinquaret: omnemq; rectè factorum occasionem caprans, ACADEMICAM integritatem, apud eos quorum in consortio viuebat, defendebat, eiusq; libentissimè patrocinium suscipiebat. Nec defuit profecto opportuna tuendæ nostræ incolumitatis occasio, alienâ obtreptione optimæ voluntati fomitem subministrante, quam ille igneâ concipiens mente, nostram dignitatem & famæ bonæ præconium, nos etiam non noscentibus personis, nunquam desijt commendare. Quid ergò iam restare videbatur, quod suæ in ACADEMIAM pietati adijci posset: cum & honestissimâ antipelargiâ, quam ab eâ hauserat eruditionem, eidem in discipulis refundere, & eius dignitatem honorifici iudicij sensu ubiq; tueretur, minimumque eius periculum, maximo suo periculo auertere fuisset paratissimus. Non tamen hic stetit NOWIEYSCIANA pietas, amplius sibi aliquid præfixit, in quo cognosci sua virtus spectariq; posset: alijs hanc reliquit gratitudinis contestandæ rationem; ipse cum æternitate pari propè gressu niti contendit; cumque animus sit immortalis, animi autem æterna perfectio literæ sint: id sibi perficiendum cogitauit, quâ ratione suam gratitudinem, cum vniuersitate rerum adæquaret; neq; prius in Altricem suam pius esse desineret; quàm cum iam non amplius deficientis suisq; conuulsæ è sedib⁹, suis emotæ è receptaculis naturæ fines paterentur. Sic enim secum in animo prudentissimo illo, & multarum virtutum complexo compendium diserebat. Quandoquidem in lautâ satis fortunâ per Diuinam gratiam sum collocatus; nihil mihi magis optandum video; quàm vt maior bonarum artium, virtutumq; omnium hereditas, à me ad posteros transeat, quàm vt agam bonum Patremfamilias, faciamq; ea quæ accepi ampliora. Libet recordari illos Professores, non minus doctrinæ vbertate, quàm simplicissimæ vitæ innocentia memorandos SIGONIOS, OPATOVIOS, VITELLIOS, BLOSIOS, HERCIOS, IANNIOVIOS, aliosq; insignes & præclaros Viros, qui iam cum ab hominibus sanctè exiissent, in celum recepti, æternis ibidem gaudijs perfruuntur, quorum

ego cum adhæsissem lateri, cum ab ijs traxi pietatis, eruditionis, modestiæq; succum, quem postea nulli vitæ per diuersa fluctuantis colores immutarunt. Ab ijs primum omnis mei boni initia profluxerunt, illi mihi hanc lucidissimam rationis sustulerunt facem, ne in hoc lubrico vitæ sæpius nunquam per deuios ducentis tramites aberrarem: illi ad culmen supremum, intento quasi digito iter demonstrarunt, in quo omnium ingenuarum mercium, omnis eruditionis repositus est thesaurus. Debeo illis has præclarissimas opiniones, menti impressas meæ; quod dolis atq; fraudibus inaccessum pectus gero, quod magis dedecus, quam mortem & cruciatum exhorreo, quod acerrimè scelera vindico, quod ad honestatis cultum egregiè sum conformatus. Debeo etiam in parte hanc ipsam meam sortem, quæ bonorum fortunæ non admodum indigeo, quæ tantum mihi video fulgentis metalli circumdatum, vt nullo negotio possim inanes dexteræ & sinus laceros indigentium, piâ prodigalitate onerare. Quid igitur est? quandoquidem horum meorum Præceptorum, intelligo minora esse didactra, quam vt desudantium in bono laboriosos satis abstergant sudores, excellentiaq; eorum opera in publicum eliciant: en me vadem, me sponsorem suæ felicitatis offero; me antesignanum, me prodromum secuturis temporibus consecro, quasiq; signum aliquod attollo ad Rempublicam literariam acrius, alacriusque promouendam. Accipite Professores optimi viginti florenorum millia, mensæ vestræ egestatem subleuate, vbi fuerit visum collocate, vsu eorum perpetuis temporibus fruimini: æternum vestrum beneficium in me fuit, æternâ etiam gratitudine illud prosequi cupio: iamq; me felicem arbitror, quod in complexu fundatæ vestræ quietis, ex hoc corporis ergastulo ad illam Patriam, in quâ omnes summi Imperatoris dono manu mittuntur, demigrabo. O Patrem potius quam filium! ô benignitatis admirandæ miraculum magis, quam exemplum! ô pietatis inauditæ incendium satius, quam flammam! Quis hic vel non stupet præ munificentia, vel præ pietate tenerimo gaudio colliquescit. Solus ne ergo tu fuisti Optime Nowieysci, qui grassantem nostris in Musæis sortis iniquitatem, & infesto sollicitudinum tumultu, nostram quietem intercipientem aduertisti: solus impetum illum, quo velut generoso equo vehebamur ad honesta cespitantem, titubantem, deficientem perspexisti: solus Professores perpetuo louis odio vexari, vt ille impius Lucianus non tam iocose, quam verè dixit, notasti, conspexisti: vt illorum commodo tantâ facilitate, tam hilari animo, tam leni suauitate, monstrum hoc indigentia, ex illorum septis opposito benignitatis ymbone eijceres, exturbares, exterminares; domo eorum, penatibus, foro, luce, congressu, arceres, interdiceres, prohiberes; hocq; Tuæ in carissimam Altricem pietatis, perpetuum exstare velles documentum. Nonnè etiam alij huius Matris copiosissimè vbera suxerunt? nonnè ex his ipsis Musarum domicilijs, eâ præsidia extulerunt, quibus rarissimâ felicitate sellas in Republica curules, & in Ecclesia dignissima loca occuparunt? nonnè alij etiam incommode satis Musas nostras in Polonia haberi, tractariq; viderunt, agnouerunt. Ita est agnouerunt: sed quemadmodum non omnis tellus eadem liberalitate reddit semina, quâ accepit; aliquando etiam plenissima coloni

vota ludit, & deludit. Quemadmodum non omnis nubes, eadem vbertate irriguos humores refundit, quâ vapores ex visceribus terræ traxit: aliquando etiam abit in nebulas, in ventos dispergitur. Quemadmodum non omnis crystallus, aquâ claritate splendidissimum solis transmittit radium quâ exceptit: aliquando etiam nâuo aliquo, aut maculâ infuscatur: ita, certè alumni huius Matris, non eadem promptissimi animi face lumen hoc augent, quâ illud accenderunt, non eadem gratissimi animi significatione, fouent Præceptorum industriam, quâ ab ijs multiplicem eruditionis & doctrinæ fructum perceperunt. Non cadit, non inquam cadit in plebeios mores, non in depressas naturas, non in vitam cuiusquam suæ vilitati consepultam, hæc tam excellens, præstantes doctrinâ viros, Præceptores suos fouendi virtus. Singularis quædam excelsa, opus est, sit natura, in ipso humanæ sapientiæ vertice, in ipso culmine prudentiæ constituta, quæ agnoscat probâ institutione omnem publicam, priuatamq; felicitatem contineri. Serpente acutiùs Epidaurio cernat hic oculus, qui intueatur vt segetis nimiam non effusuram sese vbertatem, nec arboris in sublime surrecturam proceritatem; nisi prius semina in subactò solo iaciantur, crebriq; & irrigui latices radicibus affundantur: ita certè non surrecturam adultam virorum virtutumq; propaginem; nisi Præceptor in animatos istos agros semina spargat, eruditionis, nisi diuturno vsu & defatigatione exurgētes pessimæ cōsuetudinis spinas extirpârit, nisi sapiùs latices affuderit admonitionis. Quæ solertissimi iudicij, quoniam multis negata prærogatiua est: & quid mirum est, plurimos reperiri; qui Præceptorum suorum labores, non æquè magnis rependant præmijs, cum ab ijs talia beneficia, curæq; sibi ab ijs exhibitæ, non satis iustâ æstimatione expendantur. Expendit noster NOWIEYSCIVS, atq; ita simul rependit, vt secuturæ ætati fortâ ipsis incredibile sit futurum, extinctam omnium propè Mecœnatum, in antiquos suos Præceptores humanitatem, ab vno suscitari; reddituum nostrorum etiam felicissimis temporibus paucitatem, nunc etiam interitum ab vno compensari; labentium rerum nostrarum ruinam, ab vno fulciri; fugientem ex nostris Musæis tranquillitatem ab vno sisti; totam deniq; nostram felicitatem ab vno fundari, ab vno instaurari, innouari.

Verùm quò maius admirabiliusq; est hoc tuum beneficium, Magne noster Patrone & Benefactor, eò magis imbecillitatem nostram in gratificando (iam enim ad vltimâ instituti mei partē delabor) agnoscim⁹. Quid enim simile tantis beneficijs reperiemus, quo se nostra exsoluat gratitudo? quod tantum reperietur genus pietatis, quo tuam ituram in longissimas ætates nostri Successorumq; nostrorum paternam curam prosequamur? quæ tanta affectus nostri filialis contestatio poterit cogitari, quæ seris etiam duraturam temporibus liberalitatem istam, pro dignitate valeat adæquare. Dicam planè, quod sentio: nihil habuit vel ipsa veneranda antiquitas vsu receptum, consuetudine confirmatum, Religione ipsâ venerandum, quod hic ei indèbitè à nobis conferri possit. Quid enim habuit? an laureatas illas statuas in quibus suæ restitutores quietis, tanquam in viua ac spirante imagine, gratissimæ posteritati repræsentabat? Coronandus certè vir iste laureis omni-

F

bus,

bus, laureatisq; statuis decorandus esset, sub cuius tam eximiâ protectione, iam veræ laureatis hominibus nascentur laurus, quas nulla sæuientis fortunæ fulmina, nulla fulgura contrectabunt. An gratissima illa defunctis Cenotaphia è viridi structa cespite, in quâ quot annis suauè-olentes iaciebantur rosæ, vberriam supplicantium fundebantur lachrymæ, & opiparæ ferebantur epulationes? Augendus & hoc honore esset noster NOWIEYSCIVS, qui mæltissimam à nobis sortem depulit, totq; beneficentiæ sparsit rosas, quot honestè procurandæ sustentationi nostræ impendit nummos. An aras illas clementiæ, amicitæ, vltioni, liberalitati, sæcunditati, alijsq; nescio quibus titulis quæsitissima adulatione, additis simul imaginibus, Viris illustribus discerni solitas? Et quid quæso non satis rationi conueniens à nobis committeretur, si ad venerandum Benefactorem nostrum aram liberalitati ponere-mus, quâ omnium in hoc Minus Collegium vicit promptissimas effusiones: aram clementiæ, quâ nostræ indoluit tenuitati: aram amicitæ, quâ intimo pectore nostris consuluit prospexitq; commodis: aram vltioni, quâ dirum monstrum paupertatem nouus iste Hercules Musagetes, suæ liberalitatis armis vltus est: aram sæcunditati, quâ tot nobis peperit bona, tot exstinxit mala: aram deniq; alijs virtutibus, quas omnes hac vnâ virtute munificentæ est complexus. An etiam illa æiterna Trophæa, aspectabiles Pyramides, stupendos Colossos, triumphales Obeliscos? Dignus est æterno Trophæo, qui de viâ asperrimæ fortis malignitate Trophæum crexit immortale. Dignus aspectabili Pyramide, qui tam feliciter nostras strauit ærumnas. Dignus stupendo Colosso, qui effecit ne in destituta necessarijs vitâ nostrâ, omnes ingenij functiones, velut in vacuo & arenti solo opimæ segetes, sterilescent. Dignus triumphali Obelisco, cui Musæ nostræ debent, quod cum æui inertia & iniquitate periclitarentur, eius succursu flammam sæuientem paupertatis euaserunt. An etiam illas magnificentissimas Apotheoses, in quibus emissus è rogi fastigio pauus, nouam animam cælo & sideribus destinatam, in Iouis gremium stultissimâ persuasionem defererebat. Neq; non hæc ei tribuenda esset dignatio, cuius hoc egregium in literas meritum, cum terræ vilitatem transgrediatur, meritò nobis in cælo foret reponendum. Et tamen hæc aliaq; his similia, fidenter dixero, si omnia præstaremus, nondum nostræ gratitudinis lanx, in æquâ iudiciorum trutinâ præponderaret. Saxa, statuæ, aræ, Pyramides, Colossi, Obelisci, vtcunq; prodigioso conatu excurrant in cælum, vtcunq; magnifico se iactent apparatu, vtcunq; Cyclo-pum viribus & potentia structa videantur, intereunt tamen tempestate, franguntur vi, euanescent vetustate, cedunt naturæ ad corruptionem properanti, suusq; illa tandem excipit puluis & fauilla. NOWIEYSCIANVM autem beneficium, fundatum ad perennitatem, stabit labentibus sæculis, superabit temporum iniurias, & æquo beneficii circuitu, & viuentes è præsentem, & posteros è futuro, trahens in obligationem, ætatis vtriusq; includet immensitatem, nullisq; annorum cancellis definietur. Ne si niueis quidem lilijs, aut nobilibus Cupressis, suum velaremus eximium Mausoleum aliquid saltem à nobis redderetur æquiualens. Marcescunt enim subito, defluunt subito, & delabuntur quæcunq; suis nixa radicibus inhærent terræ. NOWIEYSCIANA autem libe-

ralitas

ralitas, collata in literas annis triumphabit innumeris, & in canitie deficientis mundi senium non extimescet. Non etiam si magnificentissima Apotheosi eius animam redderemus superis, caputq; suum sideribus coronatū, quod prisca non omisit superstitio, in Iouis gremio locaremus. NOWIEYSCIANA virtus absq; cæcæ superstitionis ambitione, pennato sapientiæ recepta curru, in ipso æternitatis consistit Capitolio: de suoq; consurgens rogo, velut de odoriferâ Phœnicis strue, fruitur iam beatissimâ illa luce, quam nunc per angustissimas siderum vias dum obscurè intuemur, admiramur tamen, & ad illam intimis medullis suspiramus. Quæ sunt igitur nostræ partes in referenda Patri, Patrono & Benefactori nostro, tam promptâ, tam hilari, tam propensâ gratiâ, aut quid à nobis noster recipiet Mæcenâs benignissimus? Audire mihi rursum videor è triumphali illo busto, in quo celsior omni tumulo iacet, attollentem sideribus binis simillimos oculos, sicq; nos humanissimo & paterno affectu, alloquentem mitissimū nostrum NOWIEYSCIUM. Remitto vobis hanc vniuersam me posthumis honoribus prosequendi curam, mei optimi Professores. Nihil me mutum, nihil tacitum, nihil deniq; eiusmodi, quod exquisitam redoleat pompam potest delectare. In animis vestris omnes actiones meas, omnia ornamenta virtutum, monumenta gloriæ, laudis insignia, condi & collocari volo. Tot mihi erectas columnas, tot Pyramides locatas putabo; quot in Palladis Amphitheatro ingenia liberalibus meis impensis formabuntur. Tot mihi aras, tot Mausolea structa censebo; quot à vobis nobiles animæ ingenuâ fideliqu; institutione in lucem Patriæ educentur. Tot me sideribus, tot Apotheosis consecratum existimabo; quot vestra opera nitebunt artes, fulgebunt virtutes, lucebunt labores, splendent compositi mores, rutilabunt boni publici promouendi studia, micabunt honestissima exempla, coruscabunt ingenui candoris dotes, quot deniq; virtutes virorum, & virtutum viri scintillabunt, radiabunt.

Hoc agimus NOWIEYSCI Optime, agemusq; quâmdiu Professores, quâmdiu ACADEMICI, quâmdiu homines vixerimus. Prius nobis hanc vitâ, quàm amorem Patriæ, prius hunc spiritum, quàm fidem instituendæ iuuentutis, prius hanc auram, quàm laborandi indefessum studium eripi patiemur. Sequemur liberalitatem Tuam ducem Vir Maxime, subq; expanso eius signo obfirmantes gradus, melius quàm sub Aiæis Clypeo, dulcius quàm sub platano Xerxis, securius quàm sub ægide Palladis, tutius quàm sub Apollinis lauro, cum ignorantia generis humani, cum liuore, cum flagitijs, cum ingentibus vitijs, quæ victores gentium domuerunt, pugnabimus, dimicabimus. Neq; tamen, quandoquidem (nostræ eloquentiæ Parente, cælesti voce proclamante) ex omnibus præmijs virtutis, amplissimum est præmium gloria: eaq; est vna, quæ breuitatem vitæ posteritatis memoria consolatur, quæ efficit, vt absentes adsimus, mortui viuamus, cuius gradibus etiam homines in cælum videntur ascendere: Tuam virtutem altâ inobscuratam obliuione relinquemus. Describemus non in parietibus, aut tabulis aliquando perituris; sed in animis pectoribusq; nostris, hanc Tuam tam oculatam prudentiam, tam promptam alacritatem, tam profusam pietatem, tam stupendam beneficentiam. Pingemus imaginem liberalitatis Tuæ, sculpemus Idem

bonitatis, incidemus profundè simulacrum inauditæ munificentiae, non in chartis aut libris, non in saxis aut lapidibus; sed in sermonibus, in recordatione posterorum, in publica prædicatione: ne prius Tui memoria exolescat, quam ipsa in se obuersæ, ruentisq; naturæ compago dissoluatur. Viues & viues, vt iam exipisti, non cum hoc corpore caduco, fluxo, perituro; sed in fastis æternitatis, in fama hominum, quæ vita cum hoc Orbe, ac cum omni æuo terminatur. Id vnum est, quod tanto beneficio rependere possumus, æquare gratiam neq; possumus, neq; Tua esset si possemus. Reliquum est, vt te Deus Optime Maxime, literarum nostrarum Vindex, Stator, Defensor, à cuius omnipotenti bonitate, velut de magnifico & exuberanti fonte, sparsus est in nos, nihil tale sperantes, aut opinantes, hic NOWIBYSCIANÆ liberalitatis riuus, precemur, obsecremusq;: vt quoniam hunc nobis Optimum Patronum & Benefactorem, propè extremis nostris rebus, Vicarium tuæ benignitatis submisisti, ipse illi rependas gratiam: ipse prout instinctum dedisti; sic pijs eius succurras votis, sic ardentissimis satisfacias desiderijs, siquæ aliquâ ope humanâ indiget, opem benignissimus ipse largiaris. Pollicitus es viuæ vocis Oraculo, per tuum Sapientem: Esto misericors vt Pater, & eris tu velut Filius Altissimi. Patrem nos illum agnoscimus, Patrem prædicamus; effice, vt & ille tuus sit filius, tecumq; in felicissimâ illâ, tot singulibus expetitâ Patriâ, quiete dulcissimâ, visioneq; beatissimâ, quæ omnes nostros absorbebit dolores, perfruatur. ACADEMIÆ verò Tuæ, nobisq; eius Professoribus, quos ad hanc laboriosam vocasti Spartam, da voluntatem, da vires, da facultatem, vt quoniam inter tot aduersa impugnantium molimina, adhuc stamus, adhuc singulari tuâ protectione iuamur, defendimur, conseruamur: omnia quoq; studia occupationesq; nostras, perreni nexu, & ex debito, æternum non dissoluendo, viliissima tua mancipia, tibi dedicemus, consecremus.

D I X I.

*IESV Christo, Beatissima Virgini Matri, totiq; Calorum Curia,
sit Gratia & Gloria.*



BIBLIOTH. UNIV.



JAGELLONICAE

2.XIX.34

Biblioteka Jagiellońska



stdr0012901

